

“Sa Murta”

*Sublimi Murta de prima
In su boscu sceberada,
Totus ti portant sa stima
Po su suci nomenada.*

*Cun sidas longas e cima
Liuda ti ndi pesas,
Oi ti presentu'n rima
Ca ses de is prus eccelsas.*

*Ti conosci pagu genti
Mancai bella de bisura,
Cumentu pani calenti
'Nu tempus andast'a fura.*

*Aiaius a coromeddu
Dda bendiant in Campidanu,
Ndi portant a Casteddu
Durci che su semidanu.*

*De sa porta de cuili
M'incraru attesu spricas,
Mata ses tui umili
Sa men'e s'omini circas.*

*Fragat atesu su frori
In mesu sa tupa biancu,
A Sinnia portadd'onori
Frutu no fetzas de mancu.*

*Grisu cun su rosignolu
De tui funt'ospitaus,
Ti cantant in s'arritzolu
Cuntentus e prexaus.*

*Mandigu po pillonis
Sparau o pur'a retza,
A porceddu e anjoni
Aromas tui sa petza.*

*Custa schissiat che s'amori
E su fragu no cunfundu,
A sa taculla sabori
Si ddu donas tui profundu.
T'imperant po ornamentu
In sa bia fais figura,
Onoras su sacramentu
Cun sa tua arramadura.*

*Renniu de sa Murta niedda
De Serpeddi est sa resa,
De Tasonis a s'Arcedda
Nascit in terra Sinniesa.*

*Dominat in s'Aspragaxa
Coronat s'Arruinedda,
E fintzas in Taulaxa
Ndi frorit in sa sedda.*

*Oi ses in artu torrada
In s'atonju s'arregorta,
Dopu pranju ses circada
Cumentu'n'antiga borta.*

*Frutu de rica nobilesa
Grandu dotu t'at tzitau,
Po sabori e belllesa
In sa storia t'at sinnau.*

*O galliardu licori
De gustu sanu e dentzu,
Ses forti de colori
E profumau che incentzu.*

*Prenu de naturalesa
E sprigu de beridadi,
Fait figura sa mesa
Ca ses de calidadi.*